

各國時事類編

亨

各國時事類編卷四

歸安沈 純粹生輯

禮制

法皇誕辰鋪戶皆閉掛花旂三面遊人如蟻街市設布棚貨茶酒戲玩諸物紅衣甲兵沿街巡察夜間徧燃煤氣電氣各燈燐燦爛烟火爆竹直冲霄漢航海述奇

英都命婦每月兩次朝君主禮也乘機筆記

英君主誕辰街市懸燈慶賀有以鍍管成君主之名用煤氣燃點者有作君主帽形者有作盤香能自轉者遊人如蟻航海述奇

英都有樓藏前代國主鑽石冠金履形如九連環國主卽位時披五彩衣戴此冠登此履以理國政航海述奇

英吉利寶星大者約二寸半小者一寸金銀為之君主以賜有功者兩國之君亦可互贈此國之君亦可賜彼國之臣別有文員者祇紅綠綢一條長約一寸寬五分懸諸胸前航海述奇

按英國向章程臣民不應受別國功牌寶星之賜卽礙於別國君命而私受之亦不應佩帶以謁英君必須於受拜之時先白英君始准照常佩帶其仕於他國者及銜君命進寶星於別國

該國以功牌勞使臣不與此例美國並不應有拜受別國賞賜之例

英國大臣見其君主摘帽鞠躬以手握君主之手背而嗅之航海述奇

英吉利君主服青衣下繫百摺裙文職朝服短青褲長白襪窄幫皮鞋白緞背心青毡短衫肩有青綢一塊長七寸旁有數小塊乃防髮辮油者蓋英國古時亦有髮辮故朝服仍其舊制工字黑毡帽夾於腋下腰圍細帶佩細長劍衣之袖口襟領皆白棉織成寬二寸許露於外白皮手套武職紅衣青褲上緣金花邊寬寸許金邊工字毡帽捧白鵝翎斜戴於首腰圍白皮帶佩銅刀航海按所紀服飾乃指文職色臘武職布來恩而言二人皆非顯職疑大員服飾必有異同也

英吉利武職皆胷而手劍職之大者衣嵌金板於兩肩上長逕尺廣約二寸小金片五綴其末如組垂職小者惟右肩有之英報日記

英吉利屬馬爾他島百姓見總督過則免冠或反手及額為禮總督答禮兵弁見總督如百姓總督亦答禮英報日記

英制新歲後君主詔吉親臨議政院宣誦詔書詢問政事得失名曰開會堂先期內務大臣以外部意函請中國公使赴會是日士女塞道候觀君駕巡捕彈壓皂帽雲連沿途房屋懸紅張綵會堂門外紅衣兵挾鎗排隊立使車至則兩手舉鎗為禮門內護軍官皆兜鍪被服金花紅短衣堂上設御几距几數武陳紅錦榻其下世爵貴臣位於庭中央女眷之尤貴者左右挾之右之上為各國使臣坐次樓上以處庶僚及其妻及公使隨員貴臣皆常服襲無袖朱衣其長曳地有五等爵者橫縫白羔皮長狹如版於其背之右自四道至一道各如其等二公道子男均一道伯惟律師教士服青長袍亦曳地各國公使皆朝服衣未及膝大鑲金花飾其肩背襟袂及四袂嵌寶星於襟

之左多寡如其所賜腰圍金帶右肩斜挂雜帛抵左腋下結之亦有以金為緣綴兩膊者武職
金版飾肩圓其末綴金穗如組垂佩長刀於腰文職亦有佩劍者所著禪文武成緣金片於兩旁
自腰至足獨美利堅合眾國使臣服常服蓋民主之國上下不異以等威也免冠則同土耳其波
斯所服如各國而不免冠眾既集律師數人據案中庭攤紙執筆以俟君至無何世子威兒士名
拉伯爾威爾士則其封爵如中國之郡王與夫人相繼入位御几右隔以屏夫人戴鑲花鑽石
為額繡甲袒露兩臂及胸之半位於紅錦榻中央朝御几坐又一刻乃聞君車護軍官八人各執
儀仗前導仗長三尺以金為寶蓋或鑲獸形踞其顛首相秘根士非爾持長刀樞府大臣李志地
門捧御冠三公主綠衣如四公主碧阿他麗如繡甲袒臂皆先入左右分侍君主黑衣裙緩步來
樓上下皆起宦眷皆袒國主環向點首就坐良久肅然俄聞會堂門開士庶擁進環庭外鐵柵立
掌璽大臣決軍國難大事堅爾勒士啓書琅琅宣誦畢君主降自御座與長媳接吻而去英記
英君主於聖瞻士宮設朝令長嗣威而士代行接見禮各國公使例應帶參贊隨員往見聖瞻士
建自數百年前體制簡易與市肆毗連非君車出入所便故道光間別建柏金哈木以自居惟大
朝會仍在舊宮宮外白石為城門形護軍數百列隊於內門衛皆金鎧胄軍官入門升階兩重至
一大堂有內大臣執筆以記人數又一大堂各國使臣朝服畢集兩點鐘內宮門開其國大臣先
入國使按序入以到國先後為序威兒士狀貌軒豁金花紅短衣立君座下左為日耳曼王子喀
士顛又左為國威沙登士乖萬王子又左為公爵梯登赫弗居前接受銜名而唱之凡進見銜名

洋字書以白紙橫長三寸縱二寸著簡明進見事由初見者紅其兩旁及其背繼見則猶是拜客名片國使惟書某國欽差正使與余率贊參隨員入見威兒士鞠躬威兒士亦鞠躬語正使曰貴使之來甚愜私意語畢而退文武官紳相繼進見有與威兒士素識者亦握手致敬焉英軺日記

英君主於柏金哈木宮設朝各國使并夫人亦聚皆一鞠躬而退本地官紳及妻相繼見臣工初見者前屈一膝君主握其手臣則就君主手而嗅之有賞寶星者侍臣拔劍進君主授馬侍君主之側者為威兒士之妻及大公主綠衣似凡婦女皆肉袒不以男子擁擠為嫌手捧花冠裙采不一其後摺疊數層成蜂窩形曳地五六尺無男女但識面者俱與握手進見者至君主前侍臣掬取其裙彼此相傳章執以過防躡之而傾蹶失容也英軺日記

英君主鑾輿高大如中國制輪蓋支柱皆金飾之前後各有金身海神二鱗甲執械若護衛者然即位四十年未嘗一駕其駕以嘉會者一高輪車蓋上以金為臍屬以四爪持其四角餘八軸皆尋常官車惟略高耳英軺日記

英君主御馬八匹為一廐皆駿物毛色紅黃黑白驅之以類鞍韉羈絡亦異色紅黃者飾以金黑曰者飾以銀無相混也英軺日記

英君主維多利亞在位三十九年今年五十八歲面肥澤有嚴毅氣西人以黑為素服今君主服黑衣裙為其故夫博雅那持終身服也英軺日記

英制十月為新美亞接贊之期儀仗扈從甚都其公服長及足遍綴金花後裙曳地袖底另綴小

幅約尺亦嵌金花頂上挂鑲金雜寶一串侍者右捧金冠右捧寶劍長三尺五寸攢珠為鈇以木桿承之長四尺餘遍飾以金以其有地方之責故崇視之英軺日記

英屬五印度阿爾蘭兩總督獨尊入朝位在儲君之上阿督所居殿庭御座巍然英軺日記

英太子代君主設朝偕參贊繙譯及隨員李荊門公服赴森金司宮先與各國公使在殿外待片刻殿門既開魚貫而入公使頭等者第一班二等者第二班署公使在後余班在美國之後皮魯之前以美使因事未至故進次波斯之後從官各從公使而進至英太子前御前大臣唱名公使鞠躬太子亦鞠躬以答各使見畢以次立於殿中各部尚書負墻序立然而英國官紳旅進謁見皆入左門或入右門不得僥立殿中停留片刻也太子之視朝代君主也其諸弟及妹婿以次立於左御前大臣立於右自諸弟以及各國公使各部尚書同為受朝之人是以得留立於殿中然有時朝謁人多則須鵠立兩三點鐘之久必須朝罷太子點首而退各尚書與各公使乃得散踈禮數雖優亦頗勞也越日清臣開生松生同赴柏京邯宮殿朝見英太子妃暨他宮眷君主命太子妃代為視朝前一月即頒諭旨云朝見太子妃與朝見君主同也班行之序進退之節與森金司宮朝儀略同惟彼處有男無女此則女多少也使西日記

英都倫敦之自毀其城而更為守險之局也留一門不毀以為古蹟闔閭胥具而無朝夕啓閉之限君主車駕將入門則城主闔門而故為詰問之詞前驅告以乘輿來幸然後啓門奉黃金錠鑰以獻於君主君主曰卿總轄此城甚善其仍掌錠鑰鞠躬免冠以謝君主仍驅車以入蓋相承之

儀文如此城主自有宮室從官有不敬於城主者為失禮於倫敦之民眾之所共忿也使西日記
日斯巴尼亞國之官服則長過膝且有披肩並分紅紫藍黃白五色律政司人員衣冠皆紅狀師
則黑醫士則黃教士則白天文地理及各等學官則藍教士則紫然亦有服紅衣紅冠皆胸前懸
金鎖者出洋瑣記

德意志定例他國君后之喪俱有服制或七日十四日二十八日惟禮官之報單是從期內不公
宴惟見客之會仍赴男常服女黑衣黑手套歐遊隨筆

瑞典伴遊委員所著朝服係黑色衫褲皆寬金邊左肩垂金穗一圈航海述奇

按瑞典丹馬各國武職禮服有左右肩皆金穗者有僅左肩者余曾見之紀中未敘明文武不
免疎漏

俄皇御車四輪金頂金簷內緣回絨鋪墊靠背皆紅紫之色餘皆金色兩旁開門可坐四五人四
角以鋼條懸起作元寶色人在車內不覺搖動車箱前一椅紫呢褥金緣邊為御者所坐此春冬
之車也夏令者車箱可開上有涼棚下有冰櫃作飛龍形航海述奇

俄羅斯傳國禮冠頂嵌藍寶石如小胡桃晶瑩透澈無微瑕又有兩手托執之物一圓球球上十
字架架嵌鑽石白光閃爍大於栗一直柄約尺有咫有三節頂嵌紅寶石鮮豔如榴子亦大如栗
此三者俄皇即位之日戴其冠左手托球右手執衡以受朝賀者也初使泰西記
布魯斯於庚午正月二十六日為佳節宮中設大和會如設朝其國宗親大臣及各國公使各眷

屬威公服往屆時分班立君主先出與各公使換次執手相見各立淡數語次君后出與各女眷相見訖皆往其客座堂上樂作執事分進茶果夜半始散

初使泰西記

布魯斯君主別宮臨通衢自樓窗外觀途人仰見則免冠而過又乘常車外出遇者亦免冠使者遇諸途為之鞠躬則摘冠相答

初使泰西記

德皇傷痊回都市中遍國旗綴以松柏燃燭牕中各鋪皆奉德皇石像戴以綠紙花環各衙署以鍊管灣曲作德皇寬鷹像燃以煤氣各使署則懸各國本旗德皇入都時威陳兵衛官民商賈每隊數百人高冠新服鼓樂引導耆老奉表詣宮稱賀德皇親降階宣詞答謝大意謂百姓見予創愈懽忻鼓舞雖人藏其心不可測度然已見舉國同心毫無怨望予邀天佑遇險終夷清夜捫心何修得此此後天年有限能否與爾臣民共享昇平亦惟天所命特橫逆之來意計所不料耳國家刑律自應從議寬減先自布國始而今德意志各邦一律辦理惟異端之黨不願有君群相作亂欲其激發天良應如父老賀表所云以教誨子弟為第一要事務使通國幼稚咸得就學習尊君親上之道自不致萌叛逆之心至賀表之詞未免過譽予心甚慚今特親為答謝願臣民共諒予心宣畢耆老舉帽三呼而散

使德日記

按西人每稱中國天子高拱法宮政事之得失閭閻之疾苦無從省察泰西國主則輕騎遊歷故一言利弊無不深知此言是也不知中國何嘗廢巡狩之典特不如泰西觀劇赴宴輕舉妄動耳我

聖祖冲齡踐祚於軍事更治無不洞察隱微親征準噶爾之師深謀勝算宿將驍

服俄羅斯來聘

上諭有外洋朝貢雖為盛事恐傳至後世未必不因此反生事端 睿

慮高深遠見及百餘年之後其時吏治之清民生之厚士習之醇軍政之肅為近古所未有此無他好問察言親君子遠小人而已初何嘗藉遨遊為閑歷哉外洋國君道長變患迭乘德皇受創二次英君則前後七次俄皇美總統為黨人所弑是皆於出遊時乘機竊發近來俄國嗣皇避居離宮深溝高壘如臨大敵豈非所益者小而所失者大耶

泰西友邦有大喪國君為之素服輟樂三禮拜英君主本約赴宮中聽樂忽聞荷蘭國后之喪遂中止次日威兒士代朝羣臣皆素服所謂素服者貫黑圈於左肘如射鵰然蓋入朝則隨其國主

之服也臣下家居不素服不禁樂者分不足也中國使臣是日亦行裝不服蟒繡英軺日記

泰西衣冠制度各有不同惟就其易知者言則文武本自判然文官之帽前後俱削上以金銀綫堆作雲形衣則領袖皆織金綫武職圓帽亦有如中國之銅盔帽者帽頂以鵝毛為纓衣則兩肩皆有雲朵袖亦有雲花褲兩旁以金銀綫作長條直貫已脚文職大員多有約闊三寸之紅白綢或藍白綢披於右肩拖至脅下據云是寶星之帶武職必佩刀亦有結繩如骨骨形懸於胸際或衣後橫嵌一綸匙樣以示區別議院爵紳衣皆前短後長形頗尖削名為官衣帽則甚高亦名官帽民主之國類皆服此 出洋瑣記

歸安沈 純粹生輯

國用

漾貢物產殷阜賦稅所入除本處支銷外每年可餘四十萬嘗觀其庫中所積甚富英人極意經營十數年後當不讓印度矣西報日記

卡呢格達銀錢曰路界重三錢二分小者四分之一或八分之一上鑄英國女主像前為科頭近歲乃加之以冠蓋印度之皇冕乃各部首長所奉加尊之號也藏地通行路界至打箭爐而止銅錢二種大者曰喀夫安那每路界值三十二文小者曰拜士每路界值六十四文四拜士為一安另有公班衙銀票交易通用自路界十枚起以至千萬印度劄記

卡呢格達海船入口百貨有稅惟烟酒二物特重走私者罰亦最酷他如地稅房稅招牌稅牲畜稅水火稅百工技藝皆有捐一馬一牛必征課其煤燈自來水溷廁三項之費予僑寓時月出路界銀十八敦蓋準房租核計皆由公衙班辦理夫賦稅如此繁重而民不怨者蓋昔之土官番酋殘刻誅求今以所入之財仍為本地之用民多使之印度劄記

新嘉坡總督兼轄檳榔嶼馬拉甲衛麗斯釐三處歲徵稅課英金錢三十六萬磅其地為西南洋衝要故英吉利收稅甚薄以廣招徠英報日記

錫蘭多椰樹每歲每樹稅洋半元英報日記

蘇彝士河征收稅鈔每墩二元船中之客每人二元

印度創記

法蘭西金錢一枚重一錢八分名擘破倫即國主名可易大銀錢四枚枚重六錢二分半每枚可易小銀錢五枚枚重一錢二分半名佛郎一佛郎易銅錢大者十二枚名特蘇易小者四十二枚名蘇其徵收賦稅之數皆以佛郎計乘槎筆記

按法蘭西賦稅名目甚繁有身稅即丁酒稅海關稅地稅印稅用券據須行稅煙葉稅信稅自來火稅糖稅考稅人繳訓練未及五年之兵能通兵法者肥皂稅紙稅火藥稅馬車稅象牙球稅擊球之會稅其出款以教會之費最多每年需五十餘兆佛郎

英吉利金錢重二錢二分名磅準中國銀三兩合銀錢大者四枚枚重七錢五分小者二十枚枚重一錢五分名西林一西林易銅錢二十枚名噴呢

乘槎筆記

按英吉利磅金準銀錢四枚者定則也金銀盈缺無常磅價亦高下不一其最高之價準中國銀有至三兩五錢者

英吉利以地租稅課取之其地即於其地用之印度澳大利洲歲入逾萬萬亦祇備用地方如開河修路設書院以本地之財充本地之用而使其人民共之故無怨者使西紀程

英吉利錢幣十一種大金錢市平重二錢二分名色五倫每枚值中國銀三兩三錢五分六厘八絲易小金錢重一錢二分名哈夫色五倫二枚每枚值中國銀一兩六錢七分八厘二絲易大銀錢重七錢名克老恩者二枚每枚值中國銀八錢三分九厘二絲易小銀錢重一錢四分名為息

零五枚每枚值中國銀一錢六分七釐八毫四忽易次小銀錢重七分名西本土者二枚每枚值中國銀八分三厘九毫二忽易再次小銀錢重三分五厘名色本土者二枚每枚值中國銀四分一釐九毫五絲一忽易大銅錢重二錢七分名邊士者三枚每枚值中國銀一分三厘九毫八絲易中銅錢重一錢五分名海邊士者二枚每枚值中國銀釐九毫九絲易小銅錢名發爾英者二枚每枚值中國銀三釐四毫九絲五忽又中銀錢重三錢五分名哈夫克老恩者三枚作克老恩一枚每枚值中國銀四錢一分九厘五毫一絲此錢不甚通行又上中銀錢重二錢八分名福老倫者每枚值中國銀三錢二分五厘六毫六絲易息零二枚錢票名班克比拉自金錢五磅至十百千萬總之中國庫平銀一百兩實易英金錢二十九枚七分九釐六毫六絲六忽若以易小銅錢約二十八千六百枚英鎊日記

英吉利信局官為司之每街設書匣鑰以鑰而留其缺以受書各家先納資官中領印票寄書則黏票書上納諸匣旋有來收聚轉遞者日凡十次若寄遠則持書詣信局衡其輕重以取費每重半兩為一等如寄香港上海半兩以內一息零二邊士一兩以內二息零四邊士按等遞加行較遲如蘇士愛母登遲則費減每歲贏金五六十萬英鎊日記

英吉利電報局概係官辦共數十處每年可贏金錢二三十萬以濟國用英鎊日記
英吉利教養整經不惜重費然有不必用而用者如今年印度上尊號須詔大赦民之告貸被禁者國君代償所欠釋出萬數千人珍奇玩好越數萬里而舟車致之維多里亞即位後構兵屢勝

國勢日強迄今所入不敷所出積國債至八萬萬金錢實中國銀二十六萬七千二百四十萬兩有奇每兩輸息三釐歲息應八千十七萬餘兩英報日記

按泰西各國掌度支者於歲晚預計來年出入之款不足則貸諸民間以益之亦有貸諸他國者英法各國多至七百兆磅中國近亦貸諸外洋統地球各國無不有國債者西人有云國債益多國祚益永意為與民間通財利則上下相維效死勿去與鄰邦通財利則休戚相關救災卹難殊不知通負山積乏術清釐民間則怨譟煩興易致內亂鄰邦則強兵壓境割地以盟挖肉補瘡飲鴆解渴終非久安長治之策近年西人見我度支蹶竭力勸借資數千萬謂零星告貸易受其欺是以香餌釣之也雖西人惟利是圖而其中蓄險藏奸不可叵測土耳其之頽敝實因國債日多剝削日甚雖有善者無術整頓前車已覆後軫方道今之籌國者尚慎旃哉

英都羅亞泯別者皇家鑄錢局也金錢雜銀數分銀錢雜銅數分皆有定章其造錢以金銀銅鐵紅一過機器而成薄片再過機器而得錢形三過機器而邊板以彰四過機器而王面圖字以顯復以機器衡其輕重稍不如制剔出另鑄其衡之之具僅如小匣罩以玻璃入錢數十枚其間輕僅抄忽者自歸一區重僅抄忽者自歸一區無稍輕忽者亦自歸一區錢之流於器如蚗之行其聲如草蟲之趨兩半刻而千錢衡遍民間納稅即舊錢亦衡之因磨刷而輕減者必令補交鑄費銷毀重造曾問馬格理曰錢局天平何以罩以玻璃答曰不使侵以寒熱之氣蓋天平輕重不爽毫末若侵之以人薰之以火所衡之物輒加輕熱氣所中也濡之以水扇之以風所衡之物輒加

重寒氣所中也。銅最畏寒熱，銀次之，鐵又次之，玻璃最不畏，故以罩之。英屬天平皆領自倫敦，每歲官中派員潛往查察，有不協則易以新者，仍示罰。英報日記。

英吉利稅課無人不征，無物不征，無事不征。凡大小賣販、樹藝、畜牧、漁獵、匠作、官商、律師、教師、婚嫁、雇役皆須領準票，然後能為此準票之稅也。商賈合夥之券、出貨入貨之券、發銀收銀之券、析產領產之券、買地賣地之券皆由官驗明蓋印兩稅之，然後能行此蓋印之稅也。富室所蓄車馬每一車歲納五磅，一馬歲納三磅，一大歲納一磅。所藏珍異指環、手釧非常用者，歲稅銀十元五元不等。居民每歲所入至一百磅以上，每磅稅三邊士。官俸、君祿亦所不免。惟佃戶則稅一邊士以恤其勞。田畝按其初買受時蓋印之稅，歲以為常。每有一物一人而稅之三四重者，即如商賈既稅之於合夥，又稅之於出入貨物，又稅之於發收銀錢，又稅之於每歲贏餘層層剝削，而金銀器尤重。肆中承造銀器重三十兩，金器不及二兩，其稅皆兩磅六息零。銀器過三十兩，金器過二兩，其稅皆五磅十五息零。賣者銀器每一兩稅一息零，金器一兩稅十七息零。歲課如之。汰金器之爐匠另有征額，其來自他國攜往他國者稅倍加。玩物、賭具、煙酒、茶葉之稅更重。惟海關於土產出口不加征。每年國主祿地稅四十餘萬磅，海口稅二千餘萬磅，準票稅二三千萬磅，蓋印一千餘萬磅，房地稅二百餘萬磅，人稅四百餘萬磅，林藪稅四十萬磅，信局稅一二百萬磅，電報局稅一百餘萬磅，官報稅六七十磅。綜計所入約七千數百萬磅，出項逾乎是大工程、大軍旅則增稅尋常三邊士，增至四五邊士，或七八邊士不等。英報日記。

按英國官吏工役之稅自宰輔以至僕隸其所入二十四而取一

英都稅關在城東隅臨迷士河設稅務司四人去年徵進口稅一千零十一萬四千九百九十二磅現在每月徵三萬二千磅禮拜六日多至四萬磅收銀者僅十一人國家銀行每日二次來關收取辦公者分內外班內班七百人外班一千六百人按征收百中提五為經費稅以烟酒茶三項為大宗呂宋烟捲每重一磅征五錫林烟葉值百抽五酒每加倫_{約中國}五斤征十錫林酒之美者征至十六錫林茶葉每磅征六評息_{即銅錢一分}絲_絲助棉花皆免稅每年入官變價款約五千磅走私之貨烟捲有從饅頭內查出者鞋底內搜得者_{環遊地球錄}

德國錢幣金三品重費平二兩一分出值二十馬克重一兩零五釐出值十馬克重五分二釐半出值五馬克銀六品重七錢五分者值五馬克重五錢者值三馬克重三錢者值二馬克重一錢五分者值一馬克重七分五釐者值五十分尼重三分者值二十分尼白銅二品重一錢二分者值十分尼重六分者值五分尼紅銅二品重九分者值二分尼重五分五釐者值一分尼每一百分尼為一馬克_{歐遊隨筆}

美國費里地費城有造錢局見金塊長五寸寬二寸厚一寸者約三四十塊每塊值銀五千五百圓銀塊長八寸寬三寸厚二寸者約二百塊每值一千五百圓價值逐日不同有增無減金銀皆由泥發達卡釐方利亞等處來以機器鑄造每分時成大銀錢八十枚其對開四開十開者每分時成一百二十枚美國藏錢之所以此為第一統各國言之則居第二_{環遊地球錄}

美國戶部分四庫各存金銀錢及鈔票約四千萬圓旁為造鈔票處以銅板鑲絕細花紋文字用機器刷印每一紙必經數手數器始成以杜弊也票凡一角二角五分兩項者寬二寸五分長一寸五分一圓至一千圓者寬五寸長二寸紙不甚厚而堅軟映日作碎冰紋有戶部圖書花押銀行花押國內通行無滯工人約二千女多於男又有銅錢每值銀錢一分二分者紫銅為之五分者白銅為之銀錢有五分之一角二角五分五角四等大銀錢不多以稍重不若使票為使金錢有值銀錢二圓五角五圓十圓二十圓亦四等二十圓者大如五角銀錢重九錢有奇在美可免鈔票二十三圓零用以納關稅仍作二十圓使之吾華僅值十八九圓他國之人因是稍有訾議以不若英法各國金錢銀與票同一數目之為公也

環遊地球錄

美國進口貨稅極重每估本百圓徵稅十圓至六十圓不等土貨出口往外國或由此赴彼口皆免稅洋貨既征進口稅復轉運別口或內地亦不再稅其意蓋欲進口稅重則價值必昂國人不欲多購而專心致力以自製免金銀洩入他國也如絲綢呢絨則十中取六以此等貨皆可自製也烟酒二項例雖不禁而於人有損故稅尤重惟書籍進口則免稅以得藉他國之書而學術愈精也近來吾華及日本運去之茶亦免稅以美國地土不宜茶茶商積年虧耗甚鉅且為服食所必需也其土貨出口免稅者欲使運往他國獲利更厚貨必因日出口盛也紐約稅關每年征進口稅約四千萬圓提一成半作本關經費稅司每年俸金一萬二千圓副者五千圓管銀者七千圓上下約一千五百人

環遊地球錄

泰西洋錢通用甚難英屬用英錢法屬用法錢意大利瑞士亦用法錢美國亦用英錢西俗雜誌
泰西入口稅呂宋烟每磅征五先令六辨士烟葉每磅征二先令六辨士茶葉每磅征六辨士酒
每觔征二先令美者倍之每先令即四開洋錢一枚六辨士值一先令之半西俗雜誌

泰西各國關稅恒以戶口較量之德國近來勻計每年收稅一萬一千九百六十九萬馬克合每
人輸二馬克十之六奧國收四千六百四十七萬馬克每人輸一馬克三法國收一萬七千七百
二十九萬馬克每人輸四馬克八俄國收一萬九千二十七萬馬克每人輸二馬克六英國收四
萬一千一百二十二萬馬克每人輸十二馬克六意國收八千一百六十四萬馬克每人輸二馬
克美國收六萬二千九百萬馬克每人輸十六馬克三是英美最重奧為最輕使德日記

按此乃德國所核者故以馬克計之攷各國度支出入之數英以磅計每磅約中國銀三兩三
四錢盈縮以時法比瑞士及意之立爾希臘之得拉克馬西班牙之拍薩他皆以佛狼計約一
錢四分強德以他拉計約五錢又以馬兒克計約一錢七分弱俄以烏羅薄計約五錢奧以果
爾登計約三錢三分強意以里兒計約一錢四分四厘葡以密爾來斯計約七錢七分三厘強
土以辟阿思忒計約三錢埃及以奪洛爾計約七錢二分西班牙以辟薩計約一錢八分又以
里牙兒計約五分又以辟薩他計約一錢四分丹以立克斯他拉計約三錢八分荷以果倫計
約二錢八分強又以果爾等計約一錢八分瑞典以列斯他拉計約二錢巴西以密耳來斯計
約三錢八分美秘俱以莎羅計即七錢二分之銀錢也